

De Mwh 60 Bi Gip Dauq Dinfwngz Siuqva Hawj Gij Dajsiuq Lai Saek Yaek Saetcienz Fatok Saekrongh Moq

她 60 岁时重拾刺绣技艺 让失传危机中的彩绣重放异彩

□ Dwng Swzyingz raiz Dahdingz hoiz

Luz Lanzcinh dwg bouxswncienz gij ndangdaenj conzdungj caeuq dinfwngz dajsiuq lai saek Bouxcuengh Vujmingz, youq gwnz Gvangjsih Gunghyi Meijsuz Canjlanj ngamq dingzsat haenx, gij cozbini ndangdaenj bawxmoq Bouxcuengh de caeuq aendoih de cauuhguh haenx aeundaen le ciengigim. De daj 13 bi hainduj hag dinfwngz dajsiuq lai saek, gij dinfwngz neix swncienz daengz de gaenq dwg daihseiq daih lo.

Cozbini gyaqciq dangqmaz gij ndangdaenj Bouxcuengh gyaciz sang

Luz Lanzcinh bineix gaenq ndaej 65 bi lo, dwg bouxswncienz gij ndangdaenj conzdungj caeuq dinfwngz dajsiuq lai saek Bouxcuengh Vujmingz, de dwg bouxswncienz daihseiq daih, ciengzseiz vih cauuhguh caeuq swncienz gij ndangdaenj conzdungj caeuq dinfwngz dajsiuq lai saek Bouxcuengh Vujmingz nyaengq hwnj nyaengq roengz.

Seizneix, Luz Lanzcinh caeuq dahnungx Luz Lancunh youq Vujmingz Gih Namzningz Si co song aen bouq dangguh ranzguhong, yungh daeuj son bouxhag cauuhguh gij ndangdaenj conzdungj caeuq dinfwngz dajsiuq lai saek Bouxcuengh. Seizneix, gizneix gaenq dwg aendieg swncienz feih vuzciz vwnzva yizcanj Namzningz Si.

Gicej youq ranzguhong Luz Lanzcinh yawjraen, gwnz faqciengz caengz laeuz daih' it venj rim gij cozbini dajsiuq lai saek, dingz lai yungh daeuj dajcang faqciengz. Gij doz gwnz cozbini dajsiuq lai saek miz doenghduz, va daengj, saek ronghsien, yiengh gyaqciq. Youq caengzgeih, lengqgaiq ndangdaenj dajsiuq lai saek daenj youq gwnz ndang bouxmozdwz, lengqgaiq cozbini venj youq gwnz faqciengz. Gij cozbini ndangdaenj Luz Lanzcinh caeuq aendoih de cauuhguh haenx gig miz daegsaek conzdungj Vujmingz, miz duzfung, va, 12 swnghsiuh daengj, gij doxgaiq ndaw doz lumj caen nei, gij saek de lai cungj lai yiengh.

Dauq ndangdaenj Bouxcuengh gajndeij mingz heuhguh Bawxmoq Loegvet ndeu, dwg gij cozbini ndei aendoih Luz Lanzcinh ndawde gaiq ndeu. Gaiq cozbini neix aeu saeknding guh saekdaej, gwnz geubuh siuq miz lungz fung, va, maesiuq gig nyaed, yawj hwnjdaej gyaqciq dangqmaz. Luz Lanzcinh gaisau, dauq buhvaq neix dwg de gaengawq gij geiqndaej mwh lij iq daeuj cauuhguh. Mwh lij iq, daxmeh de ciengzseiz caeuq de gangj gij ndangdaenj bawxmoq Bouxcuengh ciuhgeq, daxmeh lij fwngz gaem fwngz son dahlwg gij fuengfap siuq doz gwnz ndangdaenj bawxmoq. Luz Lanzcinh naeuz, vihliux cauuhguh dauq Bawxmoq Loegvet neix, aendoih de yungh bae bi lai seizgan.

Gij siuq Bouxcuengh Luz Lanzcinh guh ndaej gyaqciq dangqmaz, gij siuq baij okdaej gig miz heiqseiq, ronghswgswg, yungh ndaej nanz; gij cozbini dajsiuq lai saek boiq saek gig lai, yiengh daengj gig haenq, naj siuq gig fag, gya hwnj bouxswncienz doiq gij dajsiuq lai saek conzdungj guh cauuhmoq dem, hawj gij cozbini dajsiuq lai saek engq miz gij rengz cungdongj lwgda, miz gyaciz yawj, gyaciz yisuz caeuq gyaciz yo gig sang.

Daj iq hag dinfwngz 12 bi hainduj siuq dajsiuq lai saek aennda

Vujmingz Yen dwg giz dieggoek Bouxcuengh ndawde giz ndeu, minzczuz vwnzva Bouxcuengh goek gyaeg rag raez. Gij dajsiuq lai saek Bouxcuengh Vujmingz dwg gij yisuz vwnzva gig miz daegsaek deihfueng aen minzczuz neix, youq ndaw yisuz ndawbiengz dangdieg miz aen diegvih maqhuz

youqgaenj. Miz lizsij geiqloeg, 15 sigij 30 nienzdaih, gij siuq fwngz siuq Vujmingz hainduj youq Mbanjloegvat Gaeuq hwnghwnj, gij siuq fwngz siuq mwhhaenx doiq gij fuengfap siuq miz iugouz yiemzgek, senj aeu saekmae gijmaz hix youqgaenj dangqmaz, baengz aeu baengzdoj saeko guh daeuz, saek siuq aeu nding, loeg, o daengj saek ronghsien guh daeuz.

Ranzcoj Luz Lanzcinh youq aenmbanj Mbanjloegvat Gaeuq Lozboh Cin Vujmingz Gih, mwh lij iq lwgmbwk cungj hag siuqva. Mwh Luz Lanzcinh ndaej 12 bi, daxmeh de couh son de hag siuqva, hag cimbingz, cimdieuq daengj gak cungj fuengfap siuq dajsiuq lai saek. Luz Lanzcinh hix gig maij siuqva, mwh de ndaej cib lai bi couh hainduj siuq aennda. Siuq baenz le, de couh youq ngoenzhaw aeubae gwnzhaw gai. Mwhhaenx gij doz gwnz aennda miz 12 swnghsiuh, vamauxdan daengj. "Mwhhaenx ndaw ranz hoj, gij cienz gai aennda ndaej haenx, gou cungj auma boujdiep gij cienzyungh gvaq ndwenngoeng ndaw ranz lo." Luz Lanzcinh naeuz, youq aen sigij gonq 60 nienzdaih aennda dajsiuq lai saek de siuq haenx moix aennda gai ndaej 1.5 maenz daengz 2 maenz ngaenz.

Doeklaeng, riengz bi' ndwen boudajsiuq banlaux gyalai caeuq gohyoz gisuz hwnghat riengjvaiq, aengihgi siuqva dennauj menhmenh dingilawh gij siuqva conzdungj lo. Aengihgi siuqva dennauj ndaej baenz buek cungzfuk cauuhguh siuq, cienzgoek cauuhguh gij siuq gig daemq, ndigah, gij siuqva conzdungj dingi mbouj ndaej gij cungdongj dennauj siuqva, dinfwngz conzdungj bungz daengz saetcienz.

Caiq doeklaeng, gunghyez siuqva menhmenh hwnghwnj, gij siuqva fwngz siuq doekbaih, Luz Lanzcinh daengj dingz lai vnz rox siuqva haenx hix cungj mbouj siuqva lo. Bi 2011, daeglwg ngeih Luz Lanzcinh baenzgya, de siuq mbaw soujgaengyauej bawxmoq ndeu hawj lwgbawx. Mbaw soujgaengyauej saek nding, gwnz de lij miz gij doz gyaundeij dem, haujlai vnz yawjraen le cungj haenh mbouj daengx bak. Daihgya cungj naeuz, haujlai nanz mbouj ndaej raen gij siuq baenzneix gyaundeij lo. Luz Lanzcinh dingq le fwt singj hwnjdaej, gij vnz rox dinfwngz dajsiuq lai saek Bouxcuengh gaenq mbouj miz geijlai lo, danghnaeuz mbouj swncienz, dinfwngz dajsiuq lai saek aiq yaek saetcienz. Yawjraen daihgya cungj baenzneix maij gij cozbini dajsiuq lai saek, roxnyinh lij miz hawciengz, Luz Lanzcinh dauq gaemhwnj fagcim siuqva moq lo.

Vihliux swncienz gij dajsiuq lai saek Vujmingz, Luz Lanzcinh mwhhaenx gaenq 60 bi dungyenz song dahnungx gaenq okrog bae dajgoeng haenx dauq gaemhwnj fagcim siuqva moq. Guh gijmaz saeh ngamq hainduj cungj hoj, mwhhaenx ndaw fwngz de mbouj miz gijmaz cienz, ndigah dan co dieg ranz cuengq ci iq ndeu dangguh ranzguhong, moix ndwen geij bak maenz cienzco. "Mwh ceiq hoj bae daengz Namzningz cawx mae siuqva, cij miz cibgeij maenz ngaenz, mbouj miz cienz naengh ci, gou dwg dap aenci swnhloh bae." Luz Lanzcinh hix siengj mbouj laebdaeb guh gvaq, caeklaiq miz vnz ndaw ranz haeujcoengh, de cij ndaej laebdaeb guh roengzdaej. "Gyoengq bouxguhuhong fulenz, vwnzva' gvanj hix ndaej bang gou gvaq, caen gyo' mbaiq gyoengqde." Luz Lanzcinh gaisau, Couh Yinghgi bouxvunz mwhhaenx dang bouxgvancangj Vwnzva' gvanj Vujmingz neix, gaenq youq mwh de ceiq hoj gujli de gvaq.



▲ Luz Lanzcinh cingq siuqva.

Vihliux swncienz gij siuqva Bouxcuengh, Couh Yinghgi haenqrengz bae bang Luz Lanzcinh, baugvat gij hong bauq feih vuzciz vwnzva yizcanj hanghmoeg daengj.

Ndae daengz daeglwg caeuq dahnungx daengj vnz bangcoh, Luz Lanzcinh youq bi 2013 laebbaenz Diengzhong Fwngzguh Caijsiu Nazfuz Vujmingz Gih Namzningz Si.

Swncienz dinfwngz daiq lwgsae son gij siuqva Bouxcuengh

Bi 2014, Luz Lanzcinh caeuq song dahnungx Luz Lancunh, Luz Lanzvah dawz gij cozbini gyoengqde yungh bi seizgan ndeu siuq okdaej haenx bae daengz aenhoh baijgai hawfwen "sam nyied sam" Mbanjcuengh Vujmingz camgya langh-baij, yinxhwnj fanjangj gig hung. Ngamq 3 ngoenz ndawde, couh yinx ma haujlai bouxyawj, mbangj vnz gouzra doxgap, mbangj vnz cazcam dinfwngz siuqva. Cingq dwg baez neix baijok ndaej baenz, hawj gij saenqsim sam cejnuengx de dauq cauuhguh gij dinfwngz ronghsag siuqva Bouxcuengh Vujmingz moq engq giendingh lo.

Bi 2015, dajsiuq lai saek Nazfuz ndaej liedhaej feih vuzciz vwnzva yizcanj Vujmingz. Bi 2016 ndwen 6 ngoenz 17, "Namzningz Si feih vuzciz vwnzva yizcanj daiqbiujsingq hanghmoeg" aendieg swncienz gij ndangdaenj Bouxcuengh Vujmingz youq Diengzhong Caijsiu Nazfuz banh. Seizneix, gij loihhingz cozbini diengzhong baugvat aendomq, ndangdaenj Bouxcuengh, baengzdoj Bouxcuengh, man Bouxcuengh, aennda Bouxcuengh, soujgaengyauej daengj.

Seizneix, Diengzhong Caijsiu Nazfuz ndaej mizgven bumwnz yawjnaek, hix bienqbaenz "Namzningz Si feih vuzciz vwnzva yizcanj daiqbiujsingq hanghmoeg" aendieg swncienz gij ndangdaenj Bouxcuengh Vujmingz. Luz Lanzcinh caeuq dahnungx Luz Lancunh daiq geij boux lwgsae, miz aendoih bonjfaenh lo. Gyoengqde bingzseiz hix banh aen ban son siuqva, dawz dinfwngz siuqva son hawj engq lai vnz, seizneix gaenq hwnghat baenz aendoih boudajsiuq miz 30 boux baedauq. Yamqlaeng, Luz Lanzcinh dajsueng laebdaeb banh aen ban son dinfwngz dajsiuq lai saek, gungganq engq lai vnzcaiz miz dinfwngz, baujmaenh dinfwngz dajsiuq lai saek Bouxcuengh miz vnz swnj laeng.